

Visoki predstavnik izložio konačne korake u slučaju ORA0

Međunarodna zajednica će poduzeti odgovarajuće efikasne korake kojima će osigurati da se potpuni izostanak kontrole, koji je uzrokovao skandal u slučaju ORA0, ne smije ponoviti, izjavio je danas visoki predstavnik Paddy Ashdown.

“Moramo procijeniti stupanj i obim političke odgovornosti, te stupanj i obim sistematskog nedostatka kontrole nad oružanim snagama i vojno-industrijskim kompleksima, i također moramo poduzeti mjere koje su odgovarajuće u ovakvim slučajevima,” rekao je visoki predstavnik.

General COMSFOR-a William Ward je u srijedu uputio pismo predsjedniku Republike Srpske Draganu Čaviću, u kojem je detaljno objasnio prvu reakciju međunarodne zajednice na izvještaj o slučaju ORA0, koji je Vrhovni savjet odbrane Republike Srpske 31. decembra podnio Posebnoj radnoj grupi sastavljenoj od predstavnika SFOR-a, OHR-a i OSCE-a. Radna grupa je dva mjeseca radila na analizi i procjeni više od 1500 strana pomenutog izvještaja, i zaključila da nedostaju veoma važne informacije. U pismu upućenom gospodinu Čaviću COMSFOR je tražio da se ove informacije dostave najkasnije do 17. marta.

“Dobili smo tri izvještaja o slučaju ORA0 i svaki je bio bolji od prethodnog, ali nijedan nije bio odgovarajući s obzirom na ozbiljnost ovog problema,” rekao je visoki predstavnik. “Ovaj skandal je nanio veću štetu ugledu Bosne i Hercegovine u međunarodnim krugovima nego bilo koji drugi slučaj nakon završetka rata, a radi se o suštinskom problemu neadekvatne kontrole nad oružanim snagama i vojno-industrijskim kompleksima.”

Visoki predstavnik je izjavio da je 17. mart “krajnji rok” da

vlasti Republike Srpske dostave dodatne informacije, te je dodao kako je ovaj datum izabran zato što će se, s obzirom na ozbiljnost ovog problema, o reakciji međunarodne zajednice na izvještaj Vrhovnog savjeta odbrane Republike Srpske razgovarati 28. marta na sastanku političkih direktora Vijeća za implementaciju mira u Briselu. Međunarodna zajednica će potom najaviti mjere koje planira poduzeti.

“Reagovaćemo kako nalaže ozbiljnost ovog problema,” izjavio je visoki predstavnik. “To je od ogromne važnosti, šteta načinjena ugledu BiH je tako velika, a neophodno je osigurati da se ovakve stvari ne ponove, tako da je jedina opcija koju ne mogu uzeti u razmatranje izostanak bilo kakve reakcije.”